

18/11/1998

China sokong kawal spekulasi

CHINA semalam melahirkan sokongan terhadap saranan Malaysia supaya kegiatan urus niaga mata wang dikawal selia serta keperluan untuk menyekat pengaliran modal jangka pendek.

Sokongan itu dinyatakan oleh Presiden Republik China, Jiang Zemin dalam pertemuan dua hala dengan Datuk Seri Dr Mahathir Mohamad di Hotel Palace of the Golden Horses, Sri Kembangan dekat sini.

Menteri Perdagangan Antarabangsa dan Industri, Datuk Seri Rafidah Aziz, berkata pada pertemuan itu, Zemin berpendapat adalah perlu untuk mengawal bukan saja kegiatan urus niaga mata wang malah tindak-tanduk dana lindung nilai.

"Mereka berbincang soal ekonomi secara meluas dan Perdana Menteri turut menjelaskan mengenai langkah Malaysia yang sudah menunjukkan kesan positif ke arah pemulihan ekonomi.

"Presiden China pula menceritakan prestasi ekonomi negara itu yang dijangka mencatat pertumbuhan lapan peratus tahun depan. Beliau juga menceritakan mengenai masalah di sana seperti banjir besar yang akan menjejaskan sedikit sebanyak ekonomi mereka," katanya kepada pemberita selepas pertemuan itu.

Semalam, beberapa pemimpin negara anggota Apec termasuk Perdana Menteri Goh Chok Tong (Singapura), Presiden Kim Dae-Jung (Korea Selatan) dan Dr Chiang Pin-Kung yang mewakili Presiden China Taipei dalam pertemuan dengan Dr Mahathir turut melahirkan pendapat yang sama.

Tiga pemimpin terbabit sependapat kegiatan urus niaga dana lindung nilai yang tidak terkawal menyebabkan turun/naik secara drastik pasaran saham serta nilai mata wang.

Sementara itu, jurucakap Zemin, Zhu Pang Chu, berkata China yakin kawalan dan peraturan bagi membendung spekulasi terhadap wang panas dapat memulihkan ekonomi negara.

"Kegiatan itu jika tidak dikawal turut menjejaskan ekonomi negara maju," katanya.

Beliau berkata, Zemin juga berkongsi pendapat dengan Dr Mahathir mengenai aliran krisis mata wang yang bukan saja membabitkan Asia Timur malah seluruh dunia berikutan kegiatan spekulasi.

Menurutnya, Zemin berpendapat ekonomi Malaysia semakin pulih ekoran pelaksanaan beberapa langkah kerajaan.

Kedua-dua pemimpin, katanya, turut membincangkan mengenai globalisasi ekonomi, yang harus dilihat sebagai peluang dan bukan halangan untuk membangun.

Selain Dr Mahathir, Zemin juga mengadakan perbincangan dua hala dengan Presiden Filipina, Joseph Estrada; Presiden Indonesia, B J Habibie; Perdana Menteri Singapura, Goh Chok Tong; Perdana Menteri New Zealand, Jenny Shipley dan Perdana Menteri Russia, Yevgeny Primakov.

Pada pertemuannya dengan Habibie, Zemin turut membincangkan mengenai kebajikan etnik Cina di Indonesia.

Zhu berkata, Habibie memberi jaminan sebagai rakyat Indonesia, etnik Cina di negara itu diberi layanan serupa, termasuk dalam aspek keselamatan dan undang-undang.

(END)